

# Temp da profitar dal futur?

DA CLAU DERMONT

■ **Mintgatant fa la politica svizra la parita ch'i saja da profitar, tuttina tge che saja la consequenza.** Almain è quai probablamain l'idea davos l'intenziun dal cussegl federal da vulair liberalisar exports da material da guerra er en terras cun conflicts interns, debattà quest atun. Sche la Svizra na fa betg quai, alura po insatgi auter profitar. Logic che la Svizra sto, per il profit, esser pli flexibla cun las reglas d'export.

D'in auter avis èn pliras partidas, organisaziuns e bunamain 50 000 persunas. Entaifer paucs dis han bunamain 50 000 persunas empermess ch'ellas vegnian a rimnar almain quatter sutscrizziuns per in'initiativa che vul currer questa proposta. Il rest è istorgia: Cun quest squitsch da la populaziun ha il cussegl federal decidì da spetgar sin ina decisiun dal parlament, il qual ha alura prendì posiziun encunter quest'emprova da profitar.

Interessant vid questa episodada n'è betg be la posiziun dal cussegl federal u co che lezza divergescha cun la posiziun da bun 50 000 persunas ch'èn prontas da s'engaschar encunter questa posi-

ziun. Ma era la nova via da crear ina publicitad encunter ina decisiun da las instituziuns politicas ch'ha dumagnà da provocar ina reacziun dal parlament ed ina revisiun da l'idea preschentada da l'executiva. Davos il success da questa proposta è era la plattafurma electronica «Wecollect» che nizzegia las pussaivladads modernas da crear ina rait da persunas interessadas ch'èn prontas da sa participar a la politica cun rimnar sutscrizziuns. Enstagl che partidas han la rolla da mobilisar e connectar interess po quai era la rait. Il mund digital dat uschia novs instruments ed opziuns per far atenziun a posiziuns politicas che n'èn forsa betg represchentadas ferm avunda a Berna en il parlament ed en la regenza.

Da quest'episoda politica da l'atun 2018 pudain nus avair differentas conclusiuns. Ina è forsa: Igl è temp da profitar er en Svizra da la pussaivladad d'in mund digital per dar dapli pussaivladads e forzas a la populaziun da s'engaschar e s'articular en la politica. Era sch'els prendan alura posiziun encunter l'idea da profitar economicain da guerras.

L'autur è politolog

